

17/09/1999

Masyarakat Thai kesali kenyataan liar penceramah

Chot Cha Chan

MASYARAKAT keturunan Siam/Thai Kelantan kesal dan sangat tersinggung dengan kenyataan seorang lelaki yang mengaku keturunan Cina-Siam, ketika berucap dalam ceramah parti pembangkang di Perlis pada 28 Ogos 1999 lalu.

Beliau mencarut dan menghina pemimpin negara, khasnya Perdana Menteri Datuk Seri Dr. Mahathir Mohamad serta mengatakan Umno tidak Islam.

Kami sungguh terkejut dan sangat terkilan dengan perlakuan dan sikap lelaki itu yang melampaui batas serta tidak bertanggungjawab.

Sikapnya yang angkuh, sombong dan menyentuh masyarakat agama lain adalah pendapat peribadinya saja, tidak sama sekali mewakili atau menggambarkan pandangan masyarakat Siam di negara ini.

Sesungguhnya masyarakat keturunan Siam di negara ini sentiasa menjunjung tinggi dan mengamalkan nilai hidup mulia seperti rendah diri, bermuafakat, hormat menghormati, bertolak ansur, bersefahaman dan sen-tiasa menghormati masyarakat agama lain.

Sejak sekian lama, masyarakat Siam hidup bersatu padu dan bermuafakat dengan orang Melayu. Kebetulan pula kampung orang Siam di Kedah, Kelantan, Perlis, Perak dan Terengganu berhampiran dengan kampung orang Melayu.

Masyarakat keturunan Siam di negara ini sentiasa ingat jasa dan budi baik Kerajaan Persekutuan kepada kami. Walaupun golongan minoriti, kami mendapat perhatian dan layanan yang adil daripada Kerajaan Persekutuan.

Ketika ini dilantik wakil kaum Siam Malaysia dalam Dewan Negara. Ini bermakna masyarakat Siam Malaysia ada hak bersuara dan wakil dalam pemerintahan negara ini. Kami juga berpeluang melabur dalam Amanah Saham Nasional (ASN) dan Amanah Saham Bumiputera (ASB).

Melalui kemudahan pelaburan ini, orang-orang Siam yang rata-rata miskin di luar bandar dapat menikmati kekayaan negara secara agihan saham. Kemudahan pembangunan di kampung-kampung tradisi orang Siam seperti jalan berturap tar, bekalan air bersih, telefon, elektrik, balai raya dan sebagainya juga disediakan.

Kami juga berpeluang mengambil bahagian dalam pentadbiran di peringkat daerah, kampung dan mukim.